

Ursulina Valier-Schmid,

* 7 da schaner 1922

† 6 da fenadur 1998



Il suentermiezdi dils 6 da fenadur da quest onn ha igl aunghel dil Segner deliberau l'Ursulina da sia greva malsogna el spital cantunal a Cuera. Il zenn grond dalla baselgia S. Vigeli a Sedrun ha lu annunziau alla pleiv da Tujetsch ch'ella hagi bandunau quest mund terrestre. Il Segner ha clamau tier el ina zun buna dunna, mumma, tatta, sira, quinada ed onda, ina dunna vivida en mudestadad e retratgadad.

Ursulina ei naschida ils 7 da schaner 1922 a Zarcuns, nua ch'ella ha passentau sia affonza el ravugl da sia famiglia,

cun siu bab Sep Antoni, sia mumma Mariuschla Schmid, nata Monn e cun ses fargliuns. Ella ha visitau las scolas a Sedrun, ei serendida a Churwalden e Cuera sco gidontra en famiglias ed ha gidau a casa a Zarcuns. Duront ils onns d'uiara ha ella remplazzau siu frar Vigeli en pasterneria a Rueras, ha fatg leu la pasterneria e praticau igl empriu adina vinavon en sia famiglia a Camischolas. Il schinumnau «paun mumma», las leventadas e las pettas d'uettas han adina gustau ad in e scadin ed ils recepts fan la currella dapertut entuorn, segns che la cara Ursulina viva vinvon en nus.

1948 eis ella maridada cun Francestg Valier da Camischolas ed ensemble han els survegni 5 affons. Igl Augustin, in fegl schumellin ha Niessegner clamaau tier el ella vegliadetgna da mo dus onns. Cugl agid da Diu han Ursulina e Francestg purtau quella greva crusch. Insumma ei l'Ursulina mai stada schanegiada da fridas dil destin. Igl onn 1958 ha siu consort Francestg giu in accident ed en consequenza da quel eis el semudergiaus culla sandadad duront 8 onns. Muort tut ils craps da scarpetsch ei la lavur ed il quitau per la famiglia stau lur via e lur plascher.

In criu destin ha tuccau l'Ursulina e l'entira famiglia igl onn 1968. In grev accident ha rentau ella 30 onns vid la

suppia da rodas. Duront tut quels onns ha ella demussau pazienza, curascha e mudestad exemplarica. Sia scompa ei stada la solidaritad en famiglia ed ella ha schazegiau grondamein las bunas relaziuns da famiglia. Tgei gronds plaschers ch'ella ha adina astgau haver cun ses sis beadis. Dapi igl accident ha ella adina giu agid a casa da siu consort e d'in da ses affons. Ils davos 19 onns ha la Tina giu quitau e tgirau cun in'engaschi nunstunclenteivel e schazegeivel.

Ursulina ha adina preferiu da saver star a casa nua ch'ella ha schenghegiau als ses, mo era als auters in cor aviert, ami-

cabladad e temps, temps e peda per buns discuors senza grondas lamentaschuns. Ella ei stada ina dunna cuntenza e carezeivla. Cuntenza da saver far caltschiel, igl unviern en stiva caulda e la stad sin sia terrassa ornada cun bellezia flurs.

La malsogna maligna dils davos dus onns, cunzun dallas davosas jamnas da sia veta ha menau ella sin ina via carpresa tier la mort. Uss eis ella deliberada. Deliberada dalla suppia da rodas e da tut ils mals e da tut ils quitaus. Uss astga ella entrar el reginavel da Diu.

Nus schein encrescher mo nus sperein in di sin in bien seveser.